

ԱՔԽԱԶԻԱՆ ԹՈՒՐՔԻԱՅԻ ՌԱԶՄԱՎԱՐԱԿԱՆ ՇԱՀԵՐԻ ՀԱՄԱՏԵՔՍՈՒՄ

*Գրիգոր Արշակյան, Արման Եղիազարյան**

Ռազմավարական տեսանկյունից Թուրքիան հասարակական-տնտեսական և կրոնական կապերի ամրապնդման, Կովկասի թուրքական էթնոքաղաքական հաստատման գործընթացում քաղաքական-տնտեսական հենակետ ստեղծելու համար առաջին հերթին հենվում է աբխազական հզոր համայնքի համագործակցության և օգնության վրա: Այս համատեքստում հարկ է նշել Թուրքիայի չերքեզական համայնքի գործոնը, որը բավական շոշափելի աջակցություն է ցուցաբերել աբխազներին վրաց-աբխազական պատերազմում:

Վրաց-աբխազական պատերազմը և թուրքական գործոնը

Պաշտոնական Անկարան վրաց-աբխազական հակամարտության սկսվելուն պես բավական դժվարին կացության մեջ էր հայտնվել: Մասնավորապես, 1992թ. օգոստոսի 14-ին վրացական զորքերի Աբխազիա ներխուժմամբ սկսված հակամարտությունը Թուրքիային կանգնեցրել էր դժվարին երկրնորանքի առջև: Մի կողմից, Թուրքիան հարավկովկասյան իր քաղաքականությունն իրականացնելիս մեծ կարևորություն էր տալիս Վրաստանին, մյուս կողմից՝ վրաց-աբխազական հակամարտության սկսվելուն պես՝ Թուրքիայում աննախադեպ ակտիվացավ աբխազական և չերքեզական համայնքների գործունեությունը [1, p. 287]:

Տարիների ընթացքում Թուրքիայում ձևավորվել էր ազդեցիկ հյուսիսկովկասյան համայնք: Այստեղ բնակվում են մոտ 40 հյուսիսկովկասյան ժողովուրդներ՝ աբխազներ, կաբարդիններ, դաղստանցիներ, ինգուշներ, չեչեններ և այլք, և այս բոլոր ժողովուրդներին անվանում են «չերքեզներ», որոնք իրենք իրենց սովորաբար անվանում են ադիգեյներ: 1990-ականների սկզբներին, ըստ

*Պատմական գիտությունների թեկնածու, ՀՀ սփյուռքի նախարարության աշխատակազմի հայրենադարձության և հետազոտությունների վարչության հետազոտությունների բաժնի պետ:

Պատմական գիտությունների թեկնածու, ՀՀ սփյուռքի նախարարության աշխատակազմի հայրենադարձության և հետազոտությունների վարչության պետ:

ոչ պաշտոնական տվյալների, Թուրքիայում արխագական սփյուռքը կազմում էր մոտ 500-700 հազար, իսկ ընդհանուր առմամբ այստեղ բնակվում էր մոտ 2 մլն հյուսիսկովկասցի, որոնք մեծ մասամբ բնակվում են արևմտյան և կենտրոնական Անատոլիայում [2, p. 111]:

1992թ. Կովկասյան մշակութային միության նախաձեռնությամբ 20 այլ կազմակերպությունների հետ ստեղծվեց դաշնային մարմին՝ Կովկասյան միությունը (*Kafkas Derneği*), որը շուտով ընդլայնվեց և 23 մասնաճյուղերով վերանվանվեց Կովկասյան մշակութային միություն (*Kafkas Kültür Derneği*): Այն Թուրքիայում հյուսիսկովկասցիների ամենաազդեցիկ կառույցն է մինչ օրս [3, p. 4-5]:

Հյուսիսկովկասյան համայնքը վրաց-արխագական հակամարտության ընթացքում ակտիվ լոբբիստական գործունեություն էր տանում ոչ միայն Թուրքիայի հասարակական-քաղաքական, այլև հասարակության լայն շրջանակներում: Հաջող լոբբիստական գործունեության շնորհիվ Թուրքիայում գործող Կովկասարխագական համերաշխության կոմիտեն ստացավ Թուրքիայի տարբեր քաղաքական կուսակցությունների աջակցությունը: 1992թ. հոկտեմբերին Թուրքիայի Ազգային մեծ ժողովում (ԹԱՄԺ) թեժ քննարկումներ ծավալվեցին մի կողմից՝ արխագներին, մյուս կողմից՝ վրացական իշխանություններին աջակցող պատգամավորների միջև: Այս քննարկումների արդյունքում Վրաստանի տարածքային ամբողջականության սկզբունքի հիման վրա ձեռք բերվեց փոխզիջում: Թուրքիան արխագներին և վրացիներին հումանիտար օգնություն էր ցուցաբերելու հավասարապես: Այս հանգամանքը վկայում է, որ Թուրքիայում ձևավորված արխագ էթնիկ համայնքը խորհրդարանում լոբբիստական գործունեության ճանապարհով կարողացավ ազդել Հարավային Կովկասում թուրքական քաղաքականության վրա [4, p. 33]:

Բացի այդ, Թուրքիայի իշխանությունները չէին խոչընդոտում Թուրքիայում բնակվող արխագական և չերքեզական համայնքներին՝ աջակցել արխագներին, ինչն անհանգստացնում էր պաշտոնական Թբիլիսիին [5, c. 146]: Արխագական համայնքի ակտիվ գործունեության մասին է խոսում նաև այն հանգամանքը, որ 1992-1993թթ. Արխագիայի նախագահ Վլադիսլավ Արձինբան մի քանի անգամ այցելեց Թուրքիա, ու, թեև երբեք Թուրքիայի պաշտոնատար անձանց կողմից ընդունելության չարժանացավ, այնուամենայնիվ, արխագական լոբբիի ակտիվ ազդեցության արդյունքում Թուրքիայի հասարակական կարծիքի զգալի մասն իր աջակցությունը հայտնեց Արխագիային [6, p. 195]: Այս ամենը չէր կարող չանհանգստացնել վրացական իշխանություններին, ինչն իր ազդեցությունն էր թողնում թուրք-վրացական հարաբերությունների վրա:

Թեև վրաց-արխագական պատերազմի ընթացքում Թուրքիայի հասա-

րակության մեծ մասի համակրանքն աբխազների կողմն էր, այնուամենայնիվ, պաշտոնական Անկարան միշտ էլ հանդես էր գալիս Վրաստանի տարածքային ամբողջականության օգտին, և 1992թ. հոկտեմբերի 13-ին ԹԱՄԺ-ը հանդես եկավ Վրաստանի տարածքային ամբողջականության օգտին հայտարարությամբ [7, s. 12]:

Ըստ էության, վրաց-աբխազական հակամարտությունում Թուրքիայի ներգրավմամբ էականորեն շահագրգռված էին թե՛ վրացական և թե՛ աբխազական կողմը, ինչը վրաց-աբխազական հակամարտությունում Թուրքիային տալիս էր շատ շահեկան դեր:

Ինչպես վերը նշվեց, Թուրքիայի հյուսիսկովկասյան համայնքը շոշափելի դեր է ունեցել Աբխազիայի համար վրաց-աբխազական հակամարտությունում: Վրացական զորքերի Աբխազիա ներխուժումից 2 օր անց՝ 1992թ. օգոստոսի 16-ին Կովկասյան միության (*Kaf-Der*) նախաձեռնությամբ Ստամբուլում և Անկարայում կազմակերպվեցին հզոր ցույցեր՝ ընդդեմ վրացական զորքերի Աբխազիա ներխուժման և Թուրքիայի կառավարության պասիվ դիրքորոշման: Ցույցերին մասնակցում էին հազարավոր հյուսիսկովկասցիներ [8, էջ 45]: Հյուսիսկովկասցիները մի ակնթարթում դարձան քաղաքական գործոն Թուրքիայում, իսկ Կովկասյան միությունը սկսեց ակտիվ լոբբիստական քաղաքականություն վարել, որն ուղղված էր Թուրքիայի և Ռուսաստանի դեմ:

1992թ. օգոստոսի 22-ին Թուրքիայի հյուսիսկովկասյան կազմակերպությունները հանդես եկան համատեղ հայտարարությամբ՝ դատապարտելով Վրաստանի ներխուժումն Աբխազիա: Առաջին անգամ չերքեզական համայնքը հանդես եկավ որպես միասնական ուժ: Հյուսիսկովկասյան կազմակերպությունների նախաձեռնությամբ ոչ միայն հարյուրավոր կամավորներ մեկնում էին Աբխազիա և պայքարում ընդդեմ վրացական զորքերի, այլ նաև մեծ չափերի դրամական և պարենային օգնություն էր ցուցաբերվում Աբխազիային: Դրան հաջորդեց 1992թ. օգոստոսին ադիգեյների և աբխազների միջազգային միության նախագահ Յուրի Կալմիկովի հայտարարությունը, որտեղ նա նախագգուշացնում էր Վրաստանի ղեկավար Էդ.Շևարդնաձեին, որ եթե Վրաստանը սկսի համընդհանուր զորահավաք, ապա, ի պատասխան դրա, նա կոչ կանի հյուսիսկովկասցիների համայնքին զինվել ընդդեմ վրացիների [9]:

Ինչպես վերը նշվեց, Թուրքիայի հասարակության մեծ մասը համակրանքով էր վերաբերվում աբխազներին: Այս համատեքստում հիշատակման է արժանի այն, որ, ըստ որոշ տվյալների, թուրքական հետախուզությունը և պանթուրքիստական կազմակերպությունները նույնպես մասնակցել են վրաց-աբխազական հակամարտությանը: Մասնավորապես՝ Թուրքիայի տարած-

քում, թուրքական հետախուզության և պանթուրքիստական կազմակերպությունների անմիջական մասնակցությամբ ձևավորվում էին կամավորական խմբեր, որոնք, մասնակցելով ռազմական գործողություններին, աջակցել են աբխազական կողմին: Կամավորների հավաքագրումը կատարվում էր Թուրքիայում բնակվող աբխազ մահմեդականների թվից: Այս գործին ակտիվ աջակցություն է ցուցաբերել թուրքական «Աբխազիայի հետ համերաշխության համայնք» կազմակերպությունը [10, c. 491]:

Այսպիսով, ինչպես Թուրքիայի չերքեզական համայնքի մեծ աջակցությունը, այնպես էլ պաշտոնական Անկարայի անուղղակի աջակցությունն աբխազներին, անկասկած, լուրջ դերակատարություն ունեցավ Աբխազիայում Թուրքիայի ազդեցության ամրապնդման համար:

Թուրք-աբխազական կրոնական և քաղաքական-տնտեսական հարաբերությունները

Աբխազիան, որը կարևոր դիրք է գրավում սևծովյան ավազանում և կովկասյան տարածաշրջանում, ռազմավարական և տնտեսական տեսանկյունից մեծ նշանակություն ունի Թուրքիայի համար: Վերջինի դեկավարությունը հետևողական քաղաքականություն է վարում Աբխազիայում թուրքական մշակութային տարրերի ներմուծման և ընդլայնման հարցերում: Թուրքական մշակույթի ներթափանցումն Աբխազիա լայն թափ էր ստացել դեռևս Օսմանյան կայսրության տիրապետության ժամանակ, երբ 16-րդ դարում թուրքական իշխանությունները բռնի ուժով իսլամը ներմուծեցին Աբխազիա, իսկ 17-րդ դարի սկզբին այստեղ իսլամի ազդեցությունը բավական ուժեղացավ: Սակայն Աբխազիայում իսլամը հասարակական մակարդակով այդպես էլ լայն տարածում չստացավ, և ըստ ոչ պաշտոնական տվյալների՝ այսօր երկրի բնակչության միայն 20-30 տոկոսն է իսլամադավան [11, էջ 52]:

Հարկ է նշել, որ Աբխազիայում Թուրքիայի գլխավոր խնդիրը հասարակության գաղափարական-աշխարհայացքային ձևափոխումն է: Խնդիրն այն է, որ Աբխազիայում իսլամի և թուրքական կապիտալի գործոնի հզորացումից բացի, պաշտոնական Ստամբուլը, ինչպես Մոլդովայում կամ Ղրիմում, ակտիվորեն օգտագործում է Աբխազիայում «վերաբնակեցված» հարուստ աբազիներին: Բանն այն է, որ Թուրքիայի աբազիները, որոնց 1820-30թթ. ցարական կառավարությունը արքայրել է իրենց թուրքամետ և հակառուսական կողմնորոշման պատճառով, մեծ մասամբ չեն ցանկանում վերադառնալ իրենց նախնիների հայրենիք: Այսօր Աբխազիայում, որոշ տվյալների համաձայն, ակտիվ գործում են ոչ պակաս, քան 500 աբազի և թուրք, որոնց մի

մասնակցությունը հզորացնում է իր տնտեսական, իսկ մյուս մասը՝ հասարակական, մյուսներն՝ անգամ քաղաքական ազդեցությունն Արխագիայում [12]: Ակնհայտ է, որ այս անձինք, որոնք արդեն ներկայացված են խորհրդարանում (մեկ արագին և մեկ թուրք) և պետության կառավարական ապարատում, գործում են հանրապետությունում թուրքական ազդեցության ուժեղացման օգտին: Ավելացնենք, որ արխագա-թուրքական «խումբն» ակտիվ համագործակցում է Արխագիայի մահմեդական փոքրամասնությունների հետ: Արխագիայի մահմեդականները կազմում են բնակչության ոչ ավելի, քան 18 տոկոսը, սակայն հասարակական առումով նրանց դերը զգալիորեն մեծանում է: Մասնավորապես, Թուրքիայի նախաձեռնությամբ Արխագիայում 2005 թվականից գործում են կրոնական դպրոցներ, իսկ ամենակտիվ աշակերտներին ուղարկում են Թուրքիա՝ ուսման:

Անդրադառնալով տնտեսական հարաբերություններին՝ ընդգծենք, որ Թուրքիան մեծ ուշադրություն է դարձնում Արխագիայի տնտեսության մեջ թուրքական կապիտալի ակտիվ ներթափանցմանը, որը բավական աշխուժացավ հատկապես վերջին տասնամյակում: Արխագիայում թուրքական կապիտալը հատկապես կենտրոնացված է ածխի արդյունահանման ու վերամշակման ոլորտում և անշարժ գույքի առքուվաճառքի բնագավառում [11, էջ 54]:

Մասնավորապես, մինչև 2008թ. Թուրքիան բազմիցս տարբեր միջոցներով ձգտում էր մեծացնել իր դերը չճանաչված պետության տնտեսական և քաղաքական կյանքում. գնվում էին ածխահանքեր, հաստատվել էր, թեև կիսալեզալ, բայց գործող կապ Սուխումի և Տրապիզոնի միջև: Ավելի շարունակական էին դարձել Թուրքիայում հաստատված և քաղաքական առումով ակտիվ չերթեզական համայնքի ներկայացուցիչների այցերը:

Թուրքիայի նախաձեռնությամբ արխագա-թուրքական տրանսպորտա-ծովային ուղիների հարցը բազում անգամներ քննարկվել է միջազգային տարբեր կազմակերպությունների շրջանակներում և թուրք-վրացական պատվիրակությունների փոխայցելությունների ժամանակ: Մասնավորապես, 2007թ. հունիսին Բոննում, Վրաստանի բարեկամ երկրների խմբի շրջանակներում, ՄԱԿ գլխավոր քարտուղարի ներկայությամբ թուրքական կողմն առաջին անգամ հարց բարձրացրեց թուրք-արխագական ծովային կապերի՝ այսպես կոչված լեզալացման վերաբերյալ [12]: Հիշեցնենք, որ դա տեղի ունեցավ անմիջապես այն բանից հետո, երբ պաշտոնական Սուխումը մտադրություն հայտնեց սկսել Հյուսիսային Կիպրոսի հանրապետության ճանաչման գործընթացը, ինչի պատճառով էլ Թուրքիայի և Արխագիայի միջև դե ֆակտո գոյություն ունեցող հարաբերությունների լեզալացման և իրավական պաշտպանության հար-

ցը սկսեց ընդունվել որպես Անկարայի յուրօրինակ պատասխան:

Հետաքրքրական է, որ վրացական կողմը, գիտակցելով Թուրքիայի հետ բարիդրացիական հարաբերությունների կարևորությունը, չէր համարձակվում պաշտոնապես արձագանքել առաջարկությանը և մշտապես փորձում էր ինչ-որ ուղղումներ մտցնել՝ ձգտելով Անկարայի համաձայնությամբ գոնե դեկլարել Սուխումից Տրապիզոն և հետադարձ գնացող տրանսպորտային նավերի պարունակությունը: Վրացական առաջարկությունը պարունակության վերաբերյալ կասեցվեց ինչպես թուրքական, այնպես էլ արխագական կողմից:

Ծովային կապերի լեգալացման անհրաժեշտությունը, ամենայն հավանականությամբ, կապված է Արխագիայում թուրքական ներդրողների ածխային բիզնեսի հետ, որոնք 1996-97թթ. պետությունից ակտիվորեն գնում կամ վարձում էին հանքեր և զբաղվում էին Թուրքիա հումք արտահանելով: Բացի այդ, 2006-ից սկսած՝ թուրքական գործարարներն ակտիվորեն ներդրումներ են կատարում Արխագիայում տուրիստական և հյուրանոցային բիզնեսում, որը պետության քայքայված տնտեսության հիմնական շահութաբեր բաժինն է կազմում:

Թուրքական կազմակերպություններն Արխագիա են բերում տարբեր տեսակի մթերքներ և վառելիք ու դուրս են տանում այնտեղից թանկարժեք փայտանյութ և գունավոր մետաղ: Օրինակ, միայն 1999թ. Արխագիայից տարվել է 38 հազար մ³ փայտանյութ, 32 հազար տոննա մետաղաջարդոն և 40 հազար տոննա գունավոր մետաղ: 2000թ. Գագրա քաղաքի միայն փայտային տնտեսությունը Թուրքիա է ներմուծել ավելի քան 50 հազար մ³ փայտանյութ [12]:

Սուխումի և թուրքական նավահանգիստների միջև ծովային ուղիների լեգալացման հարցի արագ լուծման մեջ թուրքական արտաքին քաղաքական իսթերիշմենթի ակտիվացմամբ աշխուժացավ նաև Արխագիայի դեկլարությունը՝ թուրքական Հյուսիսային Կիպրոսի ճանաչման հարցում: 2008թ. հունվարին Արխագիայից Հյուսիսային Կիպրոս ուղևորվեց առաջին պետական պատվիրակությունը՝ արտգործնախարար Մաքսիմ Գվինջիայի գլխավորությամբ: Պատվիրակության վերադարձին հայտարարվեց, որ Արխագիան հետաքրքրված է Հյուսիսային Կիպրոսի հետ տնտեսական և մշակութային կապերի հաստատմամբ, որտեղ ապրում է նաև արխագական սփյուռք, և պատրաստվում է բացել այդ երկրում պաշտոնական ներկայացուցչություն [12]:

Թուրքական քաղաքական-տնտեսական և էթնոդավանաբանական էքսպանսիան Արխագիայի հարցում կտրուկ ուժեղացավ 2008թ. օգոստոսյան իրադարձություններից և Ռուսաստանի կողմից այս երկրի ճանաչումից հետո:

Տեղեկանալով Ռուսաստանի մտադրությունների մասին և Արխագիա-

յում ձգտելով ստեղծել թուրքամետ ազդեցության կայուն գործոն՝ Անկարան արխագական սփյուռքի միջնորդությամբ ծավալեց առանձին խորհրդատվություններ արխագական ղեկավարության ներկայացուցիչների հետ, իբր թե արխագական պետականության ճանաչման իրավական գործընթացը սկսելու համար: Մասնավորապես, 2009թ. սեպտեմբերի սկզբին Վրաստան ժամանեց Թուրքիայի ԱԳ նախարար Ահմեդ Դավութօղլուն, երկու օր անց՝ սեպտեմբերի 10-ին, Արխագիա մեկնեց Թուրքիայի ԱԳ նախարարի տեղակալ Ունալ Չևիքոզը, որը հանդիպում ունեցավ Արխագիայի ԱԳ նախարար Սերգեյ Շամբայի հետ: Սա որևէ թուրք պաշտոնյայի առաջին այցն էր Արխագիա: Ճիշտ է, այս մասին վրացական ղեկավարությունը տեղեկացվել էր նախօրոք. Դավութօղլուն այդ մասին բարձրաձայնեց Թբիլիսիում՝ ասելով, որ ինքը ևս պատրաստվում է առաջիկայում այցելել Արխագիա: Սրանով Անկարան, փաստորեն, ցույց տվեց նաև Վրաստանի և Արխագիայի միջև հաշտարարի դեր խաղալու իր ցանկությունը [13]: Սուխումում այս այցը խիստ դրական է ընդունվել, բանակցությունները՝ կառուցողական:

Ակնհայտ է, որ Թուրքիան Արխագիան դիտում է որպես իր տարածաշրջանային քաղաքականության կարևոր մաս: Արխագիայի հետ ուղիղ կապի հաստատումը մի շարք դիվիդենդներ է տալիս Թուրքիային: Նախ՝ Հյուսիսային Կովկասի ժողովուրդների հետ Թուրքիան ավանդաբար է սերտ կապեր հաստատել՝ հաճախ արժանանալով այստեղ անջատողական տրամադրությունները սատարելու Մոսկվայի մեղադրանքներին: Ուստի, Կովկասում թուրքական ազդեցության տարածման հարցում Հյուսիսային Կովկասը միշտ յուրահատուկ դեր է խաղացել:

Բացի այդ, Անկարան Արխագիայի հետ հարաբերությունների մեջ է մտնում բացահայտ՝ նախօրոք այս մասին տեղեկացնելով Թբիլիսիին և հայտարարելով, թե դրա նպատակը Արխագիայի և Վրաստանի հաշտեցումն է: Դրանով Թուրքիան վերահաստատում է տարածաշրջանային տերության և հաշտարարի իր հավակնությունները, որը կրկին բխում է Կովկասյան պակտի նախաձեռնության տրամաբանությունից: Միաժամանակ, այս քայլը հնարավորություն չի տալիս Թբիլիսիին որևէ կերպ ընդդիմանալ Թուրքիա-Արխագիա կապերին: Թբիլիսիի համար, անշուշտ, ավելի ձեռնտու է Արխագիայի հետ հարաբերվել Անկարայի, քան Մոսկվայի միջոցով [13]:

Ըստ էության, Թուրքիա-Արխագիա անմիջական կապին չի կարող բացահայտորեն դեմ դուրս գալ նաև Ռուսաստանը: Վերջինիս համար գրավիչ է Թուրքիայի կողմից Արխագիայի ճանաչման հնարավորությունը կամ միայն այն փաստը, որ, ուղիղ հարաբերություններ հաստատելով Արխագիայի հետ,

Անկարան դե ֆակտո ճանաչում է այն: Բացի այդ, դա կարող է լրացուցիչ շփման գծեր ստեղծել կովկասյան պատերազմից հետո տարածաշրջանում ձևավորված ռուս-թուրքական համագործակցության համար: Սակայն պետք է հաշվի առնել, որ Անկարան կցանկանար Արևազիան տեսնել ոչ միայն Վրաստանից, այլև Ռուսաստանից անկախ՝ դրանով մեծացնելով նաև իր ազդեցությունը Սև ծովում:

Միաժամանակ, անիրատեսական է Թուրքիայից սպասել մոտ ապագայում Արևազիայի ճանաչումը: Անկարան ոչ մի դեպքում չի անի այնպիսի քայլ, որը կհարվածի ԼՂՀ հարցում իր դիրքորոշման «լեգիտիմությանը», չնայած այն հանգամանքին, որ Թուրքիան ժամանակին ճանաչել է Հյուսիսային Կիպրոսի թուրքական հանրապետությունը:

Արևազիան իրականում լուրջ ռազմավարական նշանակություն ունի Անկարայի համար: Այստեղ ազդեցության տարածմամբ Անկարան ոչ միայն կամբողջացնի իր Կովկասյան քաղաքականությունը, այլև կամրապնդի դիրքերը Սև ծովում: Իսկ դա մեծ առավելություններ կտա վերջինիս դեռևս նոր-նոր ուրվագծվող՝ Սև ծովի համար մղվող աշխարհաքաղաքական պայքարում:

2008թ. օգոստոսին Վրաստանի ագրեսիվ գործողությունների հետևանքով Թուրքիայի ակտիվացումից հետո կտրուկ ակտիվացան նաև կրոնական հարաբերությունները: «Բլագովեստ-ինֆո»-ի հաղորդմամբ, որը հղում է կատարում թուրքական մամուլին, դեկտեմբերի կեսին Անկարայում կայացել է Թուրքիայում կրոնական գործերի վարչության ղեկավար Ալի Բարդակ-օղլուի հանդիպումը Արևազիայի մուֆթիի տեղակալ Թիմուր Ձիբայի հետ: Հանդիպման արդյունքում որոշում է կայացվել երկկողմ կրոնական կապերի ամրապնդման մասին: Ի թիվս այլոց խոսք է եղել նաև արևազերենին տիրապետող թուրքական կրոնական գործիչներին Արևազիա ուղարկելու մասին [12]: Իրականում, սակայն, դրանք այն գործիչներն են, որոնք ժամանակին ուղարկվել էին Արևազիայից Թուրքիա՝ սովորելու:

Երկխոսության համար մեկ այլ, ոչ պակաս կարևոր թեմա դարձավ թուրքական կրոնական ֆոնդի հնարավոր մասնակցության քննարկումը, որը մտնում էր Թուրքիայի կրոնական գործերի վարչության կազմի մեջ, Սուխումում և Գուդաուտայում մզկիթների կառուցման վերաբերյալ: Թիմուր Ձիբայի խոսքերով՝ սկզբում պետք է լուծվի պաշտամունքի վայրերի համար արևազական քաղաքներում հողատարածքներ հատկացնելու խնդիրը, և հետո միայն կարելի է քննարկել մզկիթների կառուցման հարցերը:

Թուրքիայի դավանաբանական ակտիվ գործունեությունն Արևազիայում նպատակ ունի ամրապնդվել չճանաչված հանրապետություններում՝ Կարաչաևո-Չերքեզիայում և Ադիգեյում: Եթե դիտարկենք 2008թ. Թուրքիայի կովկասյան քաղաքականության ակտիվացումը հենց այս տեսանկյունից, ապա

կարելի է փաստել Անկարայի իրական ջանքերը՝ ամրապնդել իր ներկայությունն Արխագիայում՝ հանրապետությունում քաղաքական էլիտայի և հանրության թուրքամետ էթնոքաղաքական կողմնորոշման հզորացման համար: Հեռանկարում՝ աշխարհառազմավարական պլաններում, արխագական հեռանկետն ի գործ է խաղալ կրոնական ծայրահեղականության հիման վրա անջատողական փարոսի լրացուցիչ դեր ռուսական Հյուսիսային Կովկասի արևմտյան մասում:

Արխագահայությունը որպես թուրք-արխագական մերձեցման խոչընդոտ

Արխագիայի հայ համայնքը, ունենալով լրջագույն մասնակցություն վրաց-արխագական հակամարտությունում և թվաքանակով լինելով Արխագիայի ամենամեծ ազգային փոքրամասնությունը, միշտ էլ դիտվել է որպես սպառնալիք և խոչընդոտ ինչպես Արխագիայի, այնպես էլ Թուրքիայի ղեկավար որոշ շրջանակների կողմից: Մասնավորապես, Արխագիայի թուրքամետ ուժերը և հատկապես թուրքամետ քաղաքական էլիտան, մուսուլմանական առաջնորդները և արխագները ծայրաստիճան բացասական էին վերաբերվում Արխագիայում հայկական փոքրամասնության հասարակական-քաղաքական ցանկացած դրսևորման: Նրանց հիմնական մասը, մասնավորապես՝ թուրքահպատակ և մուսուլմանական ղեկավարները, ծայրաստիճան բացասաբար են վերաբերվում Արխագիայի հնարավոր միացմանը Ռուսաստանին և քարոզում են, որ եթե երկրի ղեկավարությունն այլևս ի վիճակի չէ միայնակ պահել պետության անկախության ստատուս-քվոն, ապա Արխագիայի համար ավելի ձեռնտու է միանալ Թուրքիային [14]: Այս ենթատեքստում Արխագիայի հայերը դիտվում են որպես Թուրքիայի հետ մերձենալու հիմնական արգելք: Որոշ թուրքամետ գործիչներ այսօր արդեն ստեղծում և ֆինանսավորում են արխագական երիտասարդական կազմակերպություններ՝ առաջին հայացքից ազգային-հայրենասիրական, սակայն ընդգծված հակահայկական ուղղվածությամբ:

Այս տեսանկյունից, արխագաբնակ հայության նկատմամբ 2006-ից ուժգնացած հակահայկական դրսևորումները (Սուխումի Հովի. Թումանյանի անվան հայկական դպրոցում իրականացված երկու պայթյունները, հանրապետության ոստիկանության՝ ազգությամբ հայ շուրջ հարյուր աշխատակիցների ազատվելը զբաղեցրած պաշտոններից, Գագրա և Սուխում քաղաքներում ռուսաց լեզվով հակահայկական բովանդակությամբ թուղթիկների տարածումը և այլն) կարելի է պայմանավորել նաև այդ հանգամանքով: Նախ՝ թուրքական կողմը, արխագական զարգացումներում շահարկելով հայկական գործոնը, ձգտում է Արխագիայում արհեստականորեն սերմանել ազգամիջյան

հակասություններ, ինչը թույլ կտա չճանաչված հանրապետության քաղաքական-հասարակական կյանքում մեծացնել Անկարայի լծակները՝ ի հաշիվ ռուսական դիրքերի:

Միևնույն ժամանակ, թուրքական կողմը հակահայկական քայլերի հրահրմամբ հետապնդում է Հարավային Կովկասի հայաթափման քաղաքականություն, ինչը Թուրքիայի ռազմավարության կարևոր անկյունաքարերից է: Հայտնի է, որ ռուսական կողմն ակտիվ քաղաքականություն է վարում ՌԴ հարավային շրջաններին Աբխազիայի քաղաքական-տնտեսական ու մշակութային ինտեգրման ուղղությամբ՝ օգտագործելով նաև հայության գործոնը, ուստի Աբխազիայում տեղի ունեցած հակահայկական գործողություններն էապես կիսթանեն տեղի հայության արտագաղթը դեպի ՌԴ հարավային շրջաններ, ինչն այսօր շահավետ է Թուրքիային:

Իրենց հերթին արխազական հանրապետության հայերը, որոնք աջակցություն չեն ստանում ՀՀ-ի կողմից և մոռացության են մատնված, աստիճանաբար լքում են Աբխազիան՝ դրանով իսկ ակամա նպաստելով Կովկասի այս մասում Թուրքիայի ազդեցության մեծացմանը:

Հոկտեմբեր, 2010թ.

Աղբյուրներ և գրականություն

1. *Roman Szporluk*, National Identity and Ethnicity in Russia and the New States of Eurasia, New York, 1994.
2. *Rieks Smeets*, Circassia.- Central Asian Survey, Vol. 14, No. 1, March 1995.
3. *Marje, Sönmez Baykan*, Bir Ulus Olmak, Bir Vatana Sahib Olabilmek İçin Birlemek Zorundayız, October 1992.
4. *Gareth M. Winrow*, Turkey and the Caucasus: Domestic Interests and Security Concerns. London, Royal Institute of International Affairs, 2000.
5. *Коджаман О.*, Южный Кавказ в политике Турции и России в постсоветский период, М., «Русская панорама», 2004.
6. *Mehmet Tütüncü*, The Caucasus Policy of Turkey (1990-1997): Caucasus: War and Peace: New World Disorder in Caucasia, Haarlem: SOTA, 1998.
7. *Yedi Yıldız*, Aylık Dergisi, Ekim 1994.
8. *Գրիգոր Արշակյան*, Թուրքիայի քաղաքականությունը Հարավային Կովկասում 1991-2001թթ., Երևան, 2009:
9. *Egbert Wesselink*, The North Caucasian Diaspora In Turkey, <http://www.kapba.de/CaucasianDiaspora.html>.
10. *Сваранц А.*, Пантюркизм в геостратегии Турции на Кавказе, Академия гуманитарных исследований, Монография, М., 2002.
11. *Կարեն Վերանյան*, Աբխազիան աշխարհաքաղաքական շահերի խաչմերուկում, «Նորավանք» ԳԿՀ, 21-րդ ԴԱԸ, 2005, #4:

12. *Էդուարդ Արախանյան*, Թուրքիայի ռազմավարական շահերն ու անվտանգությունը, <http://www.mitq.org/print/?l=arm&dir=2&news=2058>.
13. *Անահիտ Շիրինյան*, Թուրքիան կճանաչի՞ Աբխազիան, <http://hetq.am/am/region/abkhazia-3/>.
14. *Якубян В.*, Турция пошла в Абхазию со своей "правдой" об армянах, <http://www.hamshen.org/forum/viewtopic.php?f=9&t=200>.

АБХАЗИЯ В КОНТЕКСТЕ СТРАТЕГИЧЕСКИХ ИНТЕРЕСОВ ТУРЦИИ

Григор Аршакян, Арман Егиазарян

Резюме

Абхазия, с ее особым местом в черноморском бассейне и в кавказском регионе, имеет важное значение для Турции со стратегической и экономической точек зрения. Руководство этой страны проводит последовательную политику в деле внедрения и расширения турецких культурных элементов в Абхазии. В своей стратегии, нацеленной на укрепление экономических и общественно-культурных связей, создание политико-экономической базы в процессе турецкого этнополитического укрепления на Кавказе, Турция прежде всего опирается на сотрудничество и поддержку мощной абхазской общины: в Турции (преимущественно в восточной и западной Анатолии) проживает около 2 млн. выходцев с Северного Кавказа.

В этом контексте надо отметить фактор черкесской общины Турции, которая оказала довольно ощутимую поддержку абхазцам во время грузино-абхазской войны. Наряду с этим, конфликт, начавшийся 14 августа 1992г. со вводом грузинских войск в Абхазию, поставил Турцию перед сложным выбором. С одной стороны, Турция придавала большое значение Грузии в осуществлении своей южно-кавказской политики, с другой – сразу после начала грузино-абхазского противостояния в Турции была зарегистрирована беспрецедентная активность деятельности абхазской и черкесской общин.